



元代子部書 二卷

元

代

史料刊
叢編
初編

黃山書社

元代子部書 二卷

元
代
史料
叢刊
初編

黃山書社

欽定四庫全書

隱居通議卷三十

元 劉壎 撰

鬼神

目擊三怪

神怪之事吾素不信但即今數事乃吾目擊而身親者
殊未有以自解南豐石僊觀之前有巨樟一株世傳宋
延平辛丑歲有方士冷道者在彼修煉一日叱木使開

則木腹中虛因入其中坐化而逝未久生合里人相傳
以為神後治平丙午令公胡若者不信斧而驗之則見
道者兀然而坐儼然如生欲後來取信傳以塑繪焉自
是歷二百年木不復合予親見所斧木竅長盈尺闊數
寸中虛而枝葉茂冷道者兀坐猶故也心竊怪之越寶
祐癸丑寒食後一日大風拔木木雖仆而冷道者猶兀
坐木根之上屹無所傷屋而覆之至今猶存此不可解
者一也豐之軍山險峻倚天號江南絕頂上有石室祠

浮丘王郭三真君曰三僊禱祀者歸焉時見雲霧滃鬱
中有光如日暈大如車輪鄉人稱曰圓光光中見三僊
冠服貌像隱隱可辨其飛行翕忽或升或沈頃刻不見
此不可解者二也咸淳癸酉歲余家盱城中聞南豐母
舅家為鬼所侮每當昏時有聲歛然于屋前後或窓櫺
或庖溷環繞而鳴老幼皆縮頸滅燭噤不敢聲達旦乃
已明日復然如是者踰半年已而姪氏病且死予聞訃
往弔將就寢忽聞鬼聲去卧榻三五尺去地僅二尺且

行且鳴予叱之不止已而其聲或遠或近予亦困且睡
矣禮畢余遑反盱城後乃聞其聲漸息而舅家亦遷別
居越三載北兵薄盱城下予奉親還南豐無所於居因
假舅氏舊館寓焉則昔之鬼聲無聞矣每獨坐至夜分
亦汔寂然未幾此屋遭兵燬蕩盡然當時何其怪也此
不可解者三也神鬼有無當必有知者今紀目擊身親
者如此

雷神顯應

趙倅良驂言宋時仕潭州一日迅雷擊壽星觀碎鴟吻
道士見雷神青面緋衣裴回檐間久之始去後乃知鴟
吻中有真誥神取出之置于道寮窓內桌子上其裴回
者疑一時未定置頓之所也

鄰寺林長老自衛言至元十九年隨其師曰湖山僧錄
者寓吉州一日雷震報恩寺寺有八難觀音堂堂壁涌
壁雷繞其間久不止有僧判甘藏卜者胡人用本俗法
披紅禪衣誦一番呪語以五斗米撒之雷乃去擊其寺

門而散雷神悉取涌壁上觀音像及從神等移置案上而於涌壁之後搗擊柱木皆碎凡佛像無一損者

吾州梓源李規可圓孫有子因事微忤規可明日規可

出州訴之行至廣沙坪衆勸以反乃拜天訴子抵家以

原詞置竈中赫之未幾其子入州行至父所拜處迅雷一聲殛

死衣裳破裂如絲是日也余在郡庠講堂竊怪霹靂非常已

乃聞霹死其子身有至元鈔兩張雷火不赫朱墨煥然

秋麓叔父鏜嘗言京源曾氏有婢常棄擿米穀于糞壤

往往不加愛惜或勸止不從一日婢正撤米穀忽雷火
焚婢自頂至踵炮其半體餘半體無所傷幸不死蓋亦
憐其愚而警之

羅濟翁公讓言其鄉中有職役人二其一純實其一兇
狡純實者因某事聚少米其兇狡者緣怒悉以米棄溝
瀆中狼籍滿地純實者勸之不從一日二人同行暴風
急雨忽至雷電隨之漸覺晦冥二人者將避之而無其
所遙望前途有社林焉擬造樹下避雨既至則見社林

中有數人若吏卒或衣緋青或黃帕首急禽兇狡者粹之俄有一人若功曹然張幃幙及榜挂之命左右扶純實者去且令勿損其身俄迅雷一聲俱無所見惟見兇狡者橫屍在地此人惟頭髮被焚病啞三日而後能言所遇如此

吾里之東某里有耕夫某一日出外惟母在家舂米耕夫有子尚幼偶戲白中不覺確墜竟舂死其子素狠母懼其歸見孫兒已舂死必怒也走某家避之其子歸見

其然不言而淬礪一斧藏腰間密往求其母得之某家
邀母歸將甘心焉行至中途風雨陡暗迅雷一聲殛其
子死而母汔全雷霆於他事或恕惟不孝於親及不惜
米穀二事考罰甚嚴蓋報應屢顯豈非天條所禁二事
尤重邪丁丑年州前米戶某因忿詬棄米殛死今年甲
辰歲重五節日北郭黃某之婦忤舅姑忽雷大震繞其
家烟火滿室其婦焚髮而竄屋亦旋燬幸免殛死耳父
母生我者也五穀養我者也造物蓋於二事獨重重生

養也

大乾夢錄

予幼獲觀大乾夢錄一冊載隋溫陵太守歐陽公祐洛陽人仕閩授代歸自經邵武光澤之大乾愛其山水清秀盤桓久之已而舟溺夫婦俱死焉後人葬於其地久之發靈廟食纍受封爵為王宋時士人應舉者求夢多應好事者輯之曰夢錄世變以來文籍散失予不見此錄數十年皇慶癸丑官於劍津鄰人詹翠屏出示新刊

實錄視舊增倍因借觀之而摘其可存者漫記于後

王居西京洛陽河南府洛陽縣水南東地名福善坡東
有會仙樓南對瓦子門西抵鉄器市北有會景樓王以
某月五日生娶崔氏

隋恭帝義寧二年始立歐陽太守之廟

唐僖宗文德二年始受龍湖禪師戒斷血食

宋仁宗 闕 元年始封通應侯元豐五年進封祐民公

宗寧 闕 額曰惠應廟政和六年封廣祐王紹興 闕

廣祐王紹興十三年封明應威信廣佑王

闕

明應威信廣祐福善王嘉熙中換封

闕

福善王寶祐中又換明應威聖英惠福善王

闕

明烈威聖文惠福善王

唐僖宗少子得道於石霜和尚自湖南來邵武入龍湖
建道場號圓覺大師名普聞實有戒行見廟下烹殺甚
衆師憫焉為偈曰悟道不同死死中生不忘虎無心伏
人來與惠降殺生及死祀輪回萬劫殃為報人天界無

遮福最强欲種多生果修齋勸大王昔年地獄裏今日
作天堂是夕里老夢神云我已受圓覺禪師戒後祀我
當如比丘飯足矣自立廟歷二百七十一年而後改至今遵之
古碑載王守泉州滿歸假道邵武維舟大乾谿渚偕夫
人崔氏縱觀山川秀麗誓曰此福地可廟食復次舟行
數里風浪掀作覆舟舉家陷溺公與夫人屍存涯涘遂
沿流至于生前所誓廟食處鄉人驚異送其屍東下津
流二千里明晨逆流又至所止處鄉人復津送加以里

數翊旦又至所止處或謂斯乃賢哲人率衆備儀葬于山間越十年凶荒疫癘民始崇禱建廟塑像

劉侍郎岑作郡城熙春臺別廟祀有惠應神徐端修自吳中來過建昌訪道士王文卿文卿授五雷法能致雷雨道行甚著因語徐曰邵武頃大旱予拜表至帝所見所謂惠應神叩王陛為民請甚力帝諭若不許然神具言其州窮且瘠民不可一日無穀詞甚懇切乃得請而言其州窮且瘠民不可一日無穀詞甚懇切乃得請而

歲有秋岑聞是語心敬焉

文卿即王侍宸

實錄載邵武自宋代紹定庚寅之變比歲不靖端平甲午歲金華王子文埜為守與寓公率士民迎福善王就郡治建黃籙醮邀龍虎山張天師至時寓公杜子昕杲與祠家居與王守同主醮事命道士林逍遙拜章初拜未得達逍遙行持再往遂伏地不起自己至申州前忽雨天花一城競觀空中繽紛墜地即不見盛以衣裾亦無有踰時乃止久之林方起喜色滿面謂衆人曰適到天門遇福善王云已得請于帝子可回矣具言上帝以